

AZKEN ASTEKO GERTAKARIEN AURREAN

2020ean Covid-19aren pandemia hasi zenetik bizi izan duen une zailenetakoa bizitzen ari da Zaldibi 2021eko apirilean, hasierako etxeko derrigorrezko konfinamendu aldiaren ondoren garai zailena esango genuke.

3 astetan 140 herritar dira gaitzaz kutsatu direnak, hauen inguruko askok 10 eguneko berrogeialdi prebentiboa bete behar izan dute etxean, gehienak haurrak gainera, 7-8 herritarrek ospitale zaintza behar izan dute, Zainketa Intentsiboak ere bai kasu batean. Zaldibiako Udalak asistentzia eskaini die guztiei eta beren osasun egoeraren berri jasotzeaz gain, elikagaiak bermatu, hondakinak etxex etxe bildu eta beste edozein beharretarako gertutasuna eta bitartekoak eskaini dizkie.

Herritarrei eta herrian diharduten sektore anitzetako eragileei ere egoeraren larriaz ohartarazi zaie lehen unetik, eskura ditugun kanal guztiak erabiliz eta elkar zaintzeko deia eginez. Hala, prebentzio neurriak indartu, gizarte-jarduerak murriztu eta zalantza sortzen dien edozein sintoma edo harreman izanez gero Osakidetzara deitzeko mezua zabaldu da, behin eta berriz.

Egoera zail hauetan tentsioa eta urtebeteko nekea ere nabariak izan dira: egunetik egunera gaitza etxe askotara zabaltzen ari dela ikustea, zepa britainiar honek duen kutsakortasun-maila handia, herriko txikienengan izan duen zabalpena eta hori dela eta haur hauek bizi behar izan dutena, ospitaleratzeak, Aste Santuko oporretan herrian geratu behar izatea, 4. olatuaren itzala, pandemia aurreko egoerara itzultzeko dugun gogoa... Nekatuta eta estresatuta gaude, eta horregatik behar dugu inoiz baino gehiago elkar babestea, bakoitzaren onena ematea eta elkarri laguntzea.

Honen baitan, hiru gertakari ezberdin aipatu nahiko genituzke bereziki, azken aste honetan bizi izandakoak hirurak. Larriena, 2021eko apirilaren 7an udal ordezkari baten etxe atarian arraultzak bota zituzten norbaitzuk. Ez dakigu umekeria bat izan den ala motibazio politikoa dagoen atzean, dena den, bizikidetzara osasuntsua nahi badugu, errespetuz, tolerantziaz eta kortesiaz jardun behar dugu. Horrela bakarrik lortuko dugu zaldibitar guztiok, salbuespenik gabe jasaten ari garen pandemiaren ondorio hain kaltegarriak arintzea eta aurrera egitea. Guztiok, salbuespenik gabe, kalteberak gara.

Egun berean Lardizabal eskolara sartu eta hainbat eskola material frontoian zehar barreiatu zituzten eta 2021eko apirilaren 10eko gauean herriko plazan musika, petardo eta guzti festan ibili ziren beste zenbait. Ez dugu uste halakoek egun bizi dugun egoerari eta aurrean dugun erronkari batera eta elkartasunez erantzuteko bidea errazten dutenik.

Eta tentsio eta neke horiek azalratzea naturalena izan badaiteke ere, duela urtebeteko konfinamenduan hasi eta gaur arte esanez gatoz, denon artean gaingitu beharreko erronka dugula aurrean dugun hau eta elkar zaindu eta babestu behar garela. Jakin badakigu, Covid birusak hankaz gora jarri digula gure bizitza, eta denok gara kaltetuak, salbuespenik gabe

Bizi dugun egoera honen baitan, beraz, Zaldibiako Udaleko Udaltzako, honakoa adierazten du:

1. Zaldibian bizi dugun egoera larriari aurre egiteko, Zaldibiako Udalak gaitzak eragindako herritarrei gertutasuna eta babesa erakustez gain, eskura dituen bitarteko guztiak jartzen jarraituko du kutsatze katea eteteko.
2. Neurri berean, udal ordezkariok saiakera honetan murgiltzeko konpromisoa hartzen dugu eta baita elkarbizitza eta herritarren elkarrekiko babesa elikatzeko konpromisoa ere. Geurekiko elkarbizitza, errespetu eta babes berbera eskatzen diegu era berean herritarrei.
3. Zaldibitarrei, azken bi asteetan bereziki azpimarratzen ari garen mezuak helarazten jarraituko du Udalak, kutsatze katea eteteko elkarlanaren baitan ezinbestekoa izango delako. Prebentzio neurriak betetzea, edozein zalantzaren aurrean proba egiteko eskatzea eta kutsatuz gero Osakidetzarekin elkarlanean aritzea dira eskura ditugun tresnak, beraz momentuz hauei heltzea beste modurik ez dugu, zukati ta danokati.
4. Bukatzeko, esker mezua eman nahi diegu elkar zaintzen ari diren herritarrei eta aurrera jarraitzeko bultzada eta animoa ere helarazi nahi dizkiegu. Kantuak dioen bezela, "etorriko da egun berria, ez dago urrun udaberria!

2021eko apirilak 15

Zaldibiako EAJ-PNV